

Formador mr. Mike Eman:

Gobernador su preferencia ta pa forma un gobierno di siete minister



ORANJESTAD (AAN) — Formador mr. Mike Eman a señala, den e ronda di preguntanan den conferencia di prensa, cu Gobernador su preferencia ta pa forma un Gabinete di siete Minister.

E dignatario a subraya cu den combersacionnan cu Gobernador a wordo articula riba e situacion cu nan ta mira cu e portafolio di algun ministerio tabata bastante pisa den e ultimo cuater añanan y cu mester busca solucion sea den expansion di ministerionan of wak si por crea algo manera un Secretario di Estado pa yuda reparti e responsabilidad pa e trabao por wordo eherce na e forma cu e pueblo ta desea, cu resultadonan positivo.

Gobernador, di su parti, tambe a reflexiona riba e pensamiento aki y den lineanan general a duna e proceso cu biaha pasa tambe a realiza, unda cu e ministernan potencial a wordo gescreen pa pasa e proceso unda por ta sigur cu cada persona cu wordo nombra como minister por carga e responsabilidad ehecutivo den un staf integro cu ta forma parti di un gabinete cu tin e respet y autoridad moral, cu nos ta desea pa Aruba tin.

Prome cu eleccion e gobierno saliente a pasa un Landsbesluit unda cu nan a reafirma e proceso aki, pa garantiza e integridad di e gobernantenan y pa e proceso cu e seleccion di gobernantenan tin den dje y cu cada persona cu ta bay carga responsabilidad den gobernacion, tin e autoridad moral y bon record etico pa por ta un representante digno di nos comunidad.

Formador a indica cu el a cuminsa caba cu e tarea aki cu Gobernador a dune, y e tabata tin algun combersacion informal cu diferente personahe di nos comunidad, pa capta nan consehonan y, dialuna cu ta bin mainta, lo cuminsa cu e prome fase cu ta combersa cu gremionan y organizacionnan di trabao cu ta representa

trabaonan cu ta hopi grandi pa Aruba y cu lo ta di gran impacto pa su economia.

Dialuna lo tin un presentacion di parti di APA pa cu mudamento di waf, unda cu Gobernador lo wordo informa con leu e proyecto aki ta, kico e inversion lo ta, ki dia e ta cuminsa; despues lo papia cu ASTEK cu ta e compania cu cual APA a firma pa haci parti di e renovacion di e waf di Barcadera, y tambe nan lo duna informacion tocante e inversion rekeri, kico su impacto economico lo ta y ki

tempo e proyecto lo inicia.

Formador mr. Eman a agrega cu su intencion ta pa den henter e siman haci un inventarizacion di tur e proyectonan importante aki pa asina e siguiente siman bay papia cu e gremionan sindical y comercial.

Tambe e Formador apart di su trabao por duna informacion riba e status di algun desaroyo economico hopi importante pa nos pais, den cual nos ta mira oportunidad pa e otro sectornan di nos pais.

El a subraya cu ora cu completa e proceso di hearing aki, durante dos siman, lo bay inventariza esaki den un rapport di e Formador, cu ta duna un bista riba kico tabata e sentimentonan y prioridadnan cu a recoge for di instituto y organizacionnan cu el a papia cu nan, y e ora ey e di dos fase lo bin na vigor pa mira ken ta e personanan y cual ta e ministerionan cu nan lo kier yena pa e siguiente periodo di gobernacion di Aruba, y esey lo ta e proceso cu nan a scoge pa yega na final, pasobra locual lo compila for di e gremionan y di tur loke ta pasando social y economicamente na Aruba,

ta importante den e escogencia cu ta bay di e personalidadnan y ministerionan cu nan kier

mira den e Gabinete Mike Eman 2.